

小倉山房詩文集

冊五

小倉山房詩集卷三十

甲辰

錢唐袁枚子才

新正二十日阿遲上學

白髮生兒喜不支公然又見讀書時傳家事業從今始識字聰明上口知秋稻
晚栽期望大春鶯初轉發聲遲阿翁手授無他物晝日歸來筆一枝

花朝後三日作嶺南之遊留別隨園六首

三年遊屐未曾停又作珠江萬里行老驥不知筋力減閒雲只覺往來輕天涯

禽向寧無伴

謂霞裳

海外韓蘇合有名寄語羅浮丹竈客早教仙蝶下山迎

姜被吾家久寂寥阿連幾度手書招弟兄尚有來生約烟水寧辭去路遙兒女

開單求粵產親朋作錢趁花朝天桃莫帶消魂色待我歸來葉未凋

臨行無可繫心腸略有丁寧語數行墻祭教人還故里歸寧替女掃新房圖書

兩久勤搜蠹蘭草秋深早護霜一事思量終抱歉未能親課兩兒郎

龍門何不挈清娛遊是單身易起居天上送行千里月客中娛老一船書嬾開

黃曆占良日愛上青山製小車到處逢迎常意外不知此去又何如

余出門不占日

從古繁華說嶺南及時領略我猶堪尋梅或有三更夢飲水何妨一勺貪未卜

花船誰綺麗可知仙荔正紅酣武夷峯色匡廬瀑歸路還思次第探

曳雪牽雲意灑然金陵回首隔蒼烟春風替我爲前導白髮笑人學少年所到

總能增閱歷無求何處不神仙兒時記得曾王父八十歸來粵海天

曾祖象春公八十一

歲作
粵遊

蕪湖阻風六日喜諸故人畢至

蕪湖賢士多相識擬到蕪湖留一日何圖舟阻石尤風六日舟停行不得故人
聞信紛紛來爭攜魯酒談齊諧赭山亭邊倚檻坐蠓磯廟裏剪波回阻風領得
嬉遊趣翻怕風來吹我去但願前途再阻風都像留人在此處梅岑弟子情更
濃朝朝閒話來舟中祝風留我風不答偷捲長帆當投轄

次日風順

六日帆不張一朝風忽利真如暴貴兒得權大逞勢舟子船頭眠浪花老夫蓬

底笑啞啞封姨此情恰不領我是離家非到家

舟行十五里至澗岡梅岑饋肴烝遣人剪江而至

樓上金燈月下烟六宵情話已纏綿挂帆又送先生饌香徧春江浪一天

荻港燈下聞笛

荻港燈殘夜色深一枝風笛遠悵悵分明九曲長江水都作回波上客心如訴如啼水一涯江風何處落梅花此聲祇可衰翁聽業已蕭蕭兩鬢華

登小姑山

江心湧一山卓立冠霞表錫以小姑名千年長不老時逢三月初烟鬟梳更好高閣雲層層修篁枝嫋嫋長江頭盆寬石鏡妝臺小我來拜神前代把落花掃不敢問彭郎嫁事何時了只乞少女風一送東飛鳥

過彭澤縣愛其風景清絕有懷靖節先生

繞郭江聲響青山滿縣堂先生宰彭澤儘可傲羲皇多事督郵至惹人歸興忙千秋一枝菊從此倍芬芳

泊石鐘山正值水落見怪石森布絕無鐘聲

古有石鼓無石鐘此山疏解從坡公道是風水相衝擊四更月下聲隆隆我來
曳杖走山脚水落潮平見礪确滿地橫陳怪石供洞庭不奏鈞天樂僧雛引我
禮上方一湖春水烟茫茫古松穿石枝亂舞頗似相助吹笙簫高坐懸厓發遐
想平生所到無虛賞且學孫登長嘯聲替他代作蒲牢響

鄱陽湖

江盡入湖口漁歌四面聞鞋山標一塔鼉鼓憶千軍浪與人爭立天隨水不分
匡廬雖在望尙隔幾重雲

客裏

客裏清明記不清但逢楊柳便關情泊船難得有山處拄杖忽驚新月生十里
村莊喧社鼓一隄兒女鬪風箏湖心爲訪蝦蟆石又學飛鷁踏浪行

老去

老去無心戀歲華嬉春天氣遠離家鄱陽湖裏推蓬坐不看梨花看浪花

到廬山開先寺讀王文成公紀功碑二十四韻

兵豈書生事先生用獨殊安劉有成算克段在須臾少主雖涼德強藩敢覬覦
烽烟搖太白聲勢動全吳虎穴南昌取狼心北上孤指揮銀兔節分散木魚符
主帥方嘗膽將軍忍惜鬚兩甄鳴臥鼓三戰獲雄狐力阻親征駕安排所獻俘
河陽緩巡狩埤澤免追呼耿耿憂民意堂堂治國謨誰知公射隼正值嬖穰瑜
不賞陳湯續翻招鄧艾誣調停十常侍勝縛一庸奴暮解三千甲朝持百八珠
蒲團雙膝坐戎馬片言無冰雪心如見豚魚信可孚饒歌書露布椽筆薦珊瑚
石壁匡廬鑿龍蛇字書巖歸功天子聖垂戒甸人誅烏鼠驚師律風雲想陣圖
山河雖鼎革苔蘚未模糊學異朱元晦功同周亞夫燕然銘自好相較恐全輸
香爐峯觀瀑

挂起西江水青天作畫看四時常灑雪萬古此狂瀾松蘿休嫌濕銀河本不乾
磨厓多少字麻列白雲端
行十里至黃厓再登文殊塔觀瀑

黃厓天上生對面作浪起我頭不敢昂誠恐浪壓已豈知下望深青天反作底
山外有山立山內有山倚頗類人衣裳幅幅有表裏忽然暴雨來人天一齊洗
避登千尋塔正對一條水瀑布從高看匹練更長矣始知開先寺相離咫尺耳
只爲絕巘遮紆行十餘里

宿瞻雲寺

一宿豈偶然前生有緣在廟額題瞻雲兩樟立門外古之宗生菴重修自
昭代琳宮旣巍峨金像尤弘大相傳王右軍捨宅作香界尙有墨池存清瑩色
可愛花隱叢竹中鳥啼磬聲外豈不想留連前途有山待

早起遊萬杉寺過三峽澗坐橋上聽水

萬杉無一樹三峽猶存橋未到橋上立已聞橋下潮白龍從空來騰蹕無晝宵
誰排石作陣不許逞狂驕一阻生萬怒格鬪聲刁騷猛者滅頂過弱者伺隙逃
徐者作回波疾者奔飛猱聚疑狂泉沸散似元珠跳五百天魔舞十千戰鼓轟
老僧指殘碣有字記前朝橋造祥符年石紐猶堅牢玉淵金井字仿佛天書雕

嘆息來和聖哲匠皆倕犧懷古氣彌歛起行目尚搖祇覺兩耳中刻刻生波濤

樓賢寺贈道念上人

樓賢寺裏果樓賢留客濛濛雨一天多謝僧難爲買酒袈裟紅濕杏花烟

觀舍利

舍利盛金椀騰光似寶珠取觀還一笑未必老身無

尋湯池沒在荒草中騰騰升氣水淺難浴

湯池如處女生長落荒村不以無人浴而忘本性溫客雖相訪少泉是在山尊

轉惜華清水繁華易斷魂

過柴桑亂峯中躡梯而上觀陶公醉石

先生容易醉偶爾石上眠誰知一拳石豔傳千百年金床玉几世恆有眠者一

過人知否不如此石占柴桑勝立穹碑萬丈長

謁靖節先生祠

先生非隱士直乃顏閔徒不食米五斗偏栽柳五株尊中酒或有琴上絃并無

饑乞一頓食冥報心瞿瞿絕不作身分隨人作步趨及其入蓮社攢眉強支吾
爲佛且不喜何況爲官歟出山白雲似還家春風俱偶然吟一篇太羹玄酒初
品高情轉近詩淡味乃餘東坡大才人和之形神殊奚論王朗輩敢學華子魚
我願生當時長爲扶籃輿

路上憶隨園桃花

柳漸芊綿水漸波隨園此際好烟蘿桃花千樹開如雪讓與漁郎看得多

上五老峯遇雨迷路到萬松坪已二鼓矣

爲尋五老峯走入三里霧地號犂頭尖險絕不容步正在盤紆間暴雨來如注
輿夫不知雲踏空如踏路棘蒿亂刺人十步九欲仆退縮無可歸前行日又暮
僮僕齊嘈嘈今夜宿何處用瓦衣亦漏似虎石可怖昌黎不敢哭奉先屢悔誤
賴聞叫呼聲隱隱出深樹似海得指南有寺雲中露急將危苦狀從頭向僧訴
自笑三年遊此是一劫度

卅年邱壑慰平生垂老誰知福更清萬朵芙蓉千尺瀑匡廬山頂過清明
從萬松坪東下一路水條封山過大林寺舊基愛其水石奇險坐觀移時

東林或云卽石門澗也

清明斷雪此語欺廬山三月冰花飛我從萬松坪東下縱鐙踏破千珠璣行過
靜菴禪師塔忽見絕壁高巍巍三峯縱橫立水上其勢截業形屢屢波濤噴薄
萬壑響似有深洞蟠蛟螭恨無李清縫身繩又乏溫嶠然妖犀姑學兒童飛堦
戲投以石子傾駭之須臾不見風雷作得毋羊館龍皆癡或云卽古大林寺顏
垣尙存舊日基或云此乃石門澗水風獵獵時吹衣我亦難考景外景且贈一
首詩人詩

佛手巖

如來初出世一手指天生豈料此間石還存往日情空拳擎寶座指月起鐘聲
有負相招意詩人只管行

天池

清絕天池水澄澄漾碧空金仙常照影鐵瓦不愁風日月千峯上江湖一氣中
周顛遺像在無復弄神通寺有周顛等四仙祠

到黃龍寺尙早偕老僧往探龍潭

欲見龍潭清先招佛子伴誰知水作聲隔樹龍相喚

從寺東下仍過犁頭尖歡喜亭兩險處步行數里到棲賢寺宿

險途人重經如痛定復作其如山上客欲下竟無奈棄車徒步行自主轉膽大
空空仙下天盤盤蟻旋磨索索蟹橫爬岌岌箕屨簸非不欲三休陡下不得坐
所恃性命忘一勇敵百懦屏氣羊腸踏攢眉虎尾過棲賢長老來且笑且相賀
急呼繩床鋪踵息勸少臥誰知蹀躞餘麻鞋已全破

遊東林寺不果

東林未到小車回非戀紅塵忘講臺知道遠公今寂寞無人送過虎溪來

白鹿書院

少室山人舊草廬隔朝換作紫陽居一松門外張華蓋

路旁古松枝葉蔽帝號華蓋松

五老雲

中看讀書白鹿仙蹤流水遠青衿燈火講堂虛人間何處尋精舍稷下淹中恐不如

回舟星子謝丁竹江明府

先生作宰常欲笑如此廬山少人到忽然有客西湖來白髮看山頭屢掉先生大喜召役夫爲負行李扶籃輿入山七日如一世歸來嵐翠盈衣裾握手便詢何處好我道黃厓最幽渺對面千尋瀑布飛當空一塔烟雲繞先生更喜所見同細加甲乙談羣峯想見文章有定論千秋一榜傳宣公

壬申湖南鄉試吾鄉吳雲巖學使預決五

人果皆五魁先生其一也

詰朝置酒愛蓮亭招邀太守聽啼鶯

王文

未逢千荷池上白且看

心未去

泊滕王閣感舊

弱冠曾爲王子安滕王閣下倚闌干清風一席吹西粵丹桂三秋折廣寒海內文章傳誦易人生春夢再尋難誰知五十年前客依舊長江檻外看

蔣荅生太史病廢家居因余到後力疾追陪作平原十日之飲臨別贈歌
 先生示人杜德機儀容清癯似植鰭前年乞病辭丹墀一帆歸臥江之湄傳
 聞不一多異詞云生云死云垂危忽然我到君驚疑如以仙藥投肝脾登時起
 坐喜不支張王神氣開鬚眉詞鋒滾滾同平時箋妖語怪談神祇口所嘗澁筆
 代矯右手偏廢左手持劈裂箋素磨隄屢旁行斜上龍蛇飛錯落蝌蚪皆珠璣
 雖枯半體坐若歌吐氣尙懾千熊羆其宅幽渺樹四圍長廊疏窳窳窳池鼠姑
 花開香拂衣朝朝飲我酒一卮繁肴綺錯堆盤匱恍如元度離京師真長九日
 十見之膝前森立三瓊枝長君獻賦趨南畿仲子鳴鞭試禮闈三郎長齋步步
 隨搔摩疴癢扶履綦見贈五言玉雪霏才子孝子人中師手抱萬首藏園詩拜
 述爺命言僂僂屬我細讀如檢披意若難逢某在斯士安一序千秋垂其餘作
 者肱可麾琥珀拾芥針引磁濠梁莊惠琴鍾期此中心契非阿私我手加額重
 思維先生遭逢亦數奇少年才名海內馳殿上簪筆侍軒義一篇吟成萬口推
 頃刻官可登台司無端奉母江南歸天子時時嘆不羈東山再起欲有爲抒

所蘊畜佐明治不圖崔崔心事違今之相者但舉肥鸞鳩閱過鸞鳳姿文光雖
耀未閃屍天心翻悔生公非平生嗜義如渴猊專趨人急心孳孳晏嬰食祿無
餘資九族貧者待舉炊耳鳴陰德古所稀以先生擬真庶幾自然食報理所宜
不于其身于其兒大昌厥後今始基松根生蘭蘭生芝左視右視堪娛嬉含飴
便足當優耆何須更覓倉公醫賢者形衰神不衰王夫人言豈我欺先生未必
不期頤恨我粵行難久稽遨遊山川老更癡上堂再拜將歌驪先生掩面心淒
其自取行狀付我窺公雖不言我已知果然賤子死或遲貞銘捨我將尋誰我
亦自傷兩鬢絲臨行涕下如綆縻今生休矣來生期雲龍相逐苔岑依天上地
下無參差長江知我難別離逆風日日船頭吹

重過百花洲

九曲亭臺三面湖南州要算小蓬壺喜逢花柳暮春好記得畫船當日無網罟

事稀萍藻靜笙歌人散水雲孤前朝曾有高人住一遺長隄尚姓蘇

南宋蘇雲卿隱居于

此

謝蘊山戴可亭兩太史招集程園

五輿三菁春滿家重重樓閣貯烟霞當筵兩個鳳池客繞砌萬枝蝴蝶花曲水帶雲歸石洞亂紅隨雨落牕紗山人船泊江頭月何幸乘風到若耶

題茗生桐下聽簫圖

一枝湘竹最多情吹得英雄白髮生怪底中年謝安石愛扶殘病聽秋聲
百尺梧桐倚碧霄三行雛鳳影超超大郎此日迎
鑾去正學王褒賦洞簫
擗管佳人翠袖孤分明畫出采鸞圖不知元相金閨寵我是楊炎許見無

徐穉子墓

不是耽高隱其如漢季何功勛歸稼穡氣數聽山河下榻知交少生芻涕淚多
祇今三尺土若個比巍峨

舟移新興洲爲風所覆

移舟非行舟忽然舟覆水幸而中副車所傷尙無幾追憶出門時匝月治行李
凡是客中需苟有苟完矣一旦付波臣空空我而已糗糒及盤匱物物從頭始

所費既不貲所具寧能美自嘆七十翁遠行原非理心非利名牽興從山水起
倘作減頂占亦是偶然耳風豈有心哉未必憐老子因之小坎軻轉生大歡喜
徐徐肯畜求急急衣裳洗記得遼海人常行再生禮

過萬安縣山水漸佳

舟過萬安縣悠然心目開恍疑仙境入只見好山來樹色千層錦灘聲四面雷
懸厓幾茅屋遠望似樓臺

從綿津至贛州儲潭得絕句五首

路上綿津不問津儲潭小住拜灘神

廟塑十人神像

欣看一路春山好梳就烟鬟若待

人

琉璃四面水雲鋪屈曲風帆路欲無略綴亭臺三兩座人間何處說西湖
樟樹迷離密不分幾聲雞犬樹中聞濛濛一縷茅簷白知是炊烟是晚雲
漁翁底事不歸家細雨濛濛立淺沙生怕魚驚竿不動蓑衣吹滿碧桃花
莫惱磯多行路難但教目悅即心安荆關已過倪黃到日日天公送畫看

十八灘

一灘已覺險況乃灘十八何年脩羅王留此衆羅刹沉者如伏蛟水中暗吞鱗
浮者排陣圖當頭作阻遏攤門豈安橫井底亂投轄觸艙或怒僵逢纜必全割
偉哉篙工勇入水將舟奪初將周鼎扛繼作宋人堰但聞聲許許愈知難戛戛
周旋石縫中隙罅輒先察堅忍橫逆來拱護使上達保國解下裳強鑿類鐵拔
南船雖將牢北兵甚操刺水犀軍已成石婆黨盡殺小屈總是伸大度何妨豁
三日出重圍橈聲鳴軋軋

南安蔡公子清岷家鏡伊明府招遊了山

峯作雙丫勢名應配小姑溪深乘筏渡石墜倩藤扶有瀑山纔活無僧佛亦孤
不知蒼耳子可認白雲夫

過梅嶺

南戒一嶺橫拔地三百丈想見趙尉佗借此作屏障樓船十萬師到此氣凋喪
一朝雖掃除王道未坦蕩直至曲江公蠶叢始開創峨峨雙闕門尙存斧鑿狀